

REGIONAL NEWS UNIT  
ALL INDIA RADIO, AGARTALA  
Date: 06-06-2024  
Time: 07:55-08:05 PM Hrs  
BENGALI EVENING BULLETIN

---

**Headlines :**

- (১) রাজ্যে আসন্ন ত্রিস্তরীয় পঞ্চায়েত নির্বাচনের জন্য আজ খসড়া ভোটার তালিকা প্রকাশ করা হয়েছে ।
- (২) অষ্টাদশ লোকসভা নির্বাচনে ভোটার হারে ত্রিপুরা তৃতীয় স্থানে রয়েছে ।
- (৩) সরকার গঠনের লক্ষ্যে এনডিএ তাদের প্রস্তুতি চূড়ান্ত করেছে ।
- (৪) রাজ্য ক্রিকেট সংস্থা আয়োজিত সদরের আন্তঃ স্কুল মেয়েদের টি-২০ ক্রিকেট প্রতিযোগিতায় আজ একটি খেলা হয় ।

\*\*\*\*\*

\*\*

**Panchyat Election :**

রাজ্যে আসন্ন ত্রিস্তরীয় পঞ্চায়েত নির্বাচনের জন্য আজ খসড়া ভোটার তালিকা প্রকাশ করা হয়েছে। রাজ্যের মোট ৩৫টি ব্লকের বিডিও তথা নির্বাচন নিবন্ধন আধিকারিকগণ এই খসড়া ভোটার তালিকা প্রকাশ করেছেন। খসড়া ভোটার তালিকায় মোট ভোটার

রয়েছেন ১২ লক্ষ ৯৫ হাজার ৮৬ জন। এরমধ্যে পুরুষ ভোটার ৬ লক্ষ ৫৯ হাজার ১৩ জন, মহিলা ভোটার ৬ লক্ষ ৩৬ হাজার ৬২ জন ও তৃতীয় লিঙ্গের ভোটার ১১ জন। আজ থেকেই খসড়া ভোটার তালিকার উপর দাবি ও আপত্তি গ্রহণের কাজ শুরু হয়েছে। তা চলবে আগামী ১৩ই জুন পর্যন্ত। দাবি ও আপত্তি সমূহের নিষ্পত্তির কাজ আগামী ১৪ই জুন থেকে ১৮ই জুনের মধ্যে সম্পন্ন হবে। চূড়ান্ত ভোটার তালিকা প্রকাশ করা হবে আগামী ২৪শে জুন।

আমবাসা ব্লকের বিডিও মুনমুন দেববর্মা আজ খসড়া ভোটার তালিকা প্রকাশের আগে বিভিন্ন রাজনৈতিক দলের প্রতিনিধিদের নিয়ে একটি সর্বদলীয় বৈঠক করেন। বৈঠক শেষে তিনি সাংবাদিকদের জানান, খসড়া ভোটার তালিকায় আমবাসা ব্লকে পঞ্চায়েত নির্বাচনের জন্য ভোটার রয়েছেন মোট ৯ হাজার ৯ শত ২৪ জন, এর মধ্যে পুরুষ ভোটার ৪ হাজার ৯ শত ৫৭ জন এবং মহিলা ভোটার ৪ হাজার ৯ শত ৬১ জন। তৃতীয় লিঙ্গের ভোটার রয়েছে ৬ জন।

\*\*\*\*\*

#### **Panchayet Election-Khowai :**

খোয়াই ব্লকের বিডিও অভিজিৎ দাস জানিয়েছেন, খসড়া ভোটার তালিকায় খোয়াই ব্লকের ২৫টি গ্রাম পঞ্চায়েতে মোট ভোটার ৪৮ হাজার ৬৩৭ জন। কল্যাণপুর ব্লকের বিডিও কীর্তিকা সাহা জানিয়েছেন, কল্যাণপুর ব্লকের ১৪টি গ্রাম পঞ্চায়েতে মোট ভোটার ২৭ হাজার ৪৫৭ জন। তেলিয়ামুড়া ব্লকের বিডিও নূর

জামাল ইসলাম জানিয়েছেন তেলিয়ামুড়া ব্লকে মোট ১৭টি গ্রাম পঞ্চায়েতে মোট ভোটার সংখ্যা ৩৮ হাজার ৯৪৮।

\*\*\*\*\*

**Electroral Roll-Unakoti :**

ঊনকোটি জেলার জেলা পঞ্চায়েত আধিকারিক ডেভিড হলাম জানান, খসড়া তালিকা অনুসারে, ঊনকোটি জেলাতে মোট ভোটারের সংখ্যা ১ লক্ষ ২৮ হাজার ৮৯৮ জন। এরমধ্যে গৌরনগর ব্লকে ৪৩০৬২ জন, চন্ডীপুর ব্লকে ২৮৬৭০ জন এবং কুমারঘাট ব্লকে ৫৭১৬৬ জন। উল্লেখ্য যে, ঊনকোটি জেলাতে মোট ষাটটি গাঁও পঞ্চায়েত রয়েছে। এদিকে কুমারঘাট ব্লকের B.D.O'র অফিস কক্ষে বিভিন্ন রাজনৈতিক দলের প্রতিনিধিদের নিয়ে আজ এক সর্বদলীয় বৈঠক অনুষ্ঠিত হয়। এতে সভাপতিত্ব করেন, নির্বাচন নিবন্ধন আধিকারিক তথা ব্লকের বিডিও ডক্টর সুদীপ ভৌমিক। বৈঠকে কংগ্রেস, বি.জে.পি, সি.পি.আইএম, তিপরা মথা ও ফরোয়ার্ড ব্লকের প্রতিনিধিরা অংশ নেন।

\*\*\*\*\*

**Panchayat Election-South :**

দক্ষিণ জেলার ভারতচন্দ্র নগর ব্লকের বিডিও কাবেরী নাথ জানিয়েছেন, এই ব্লকে খসড়া ভোটার মোট ২৮ হাজার ৬২৪ জন। এর মধ্যে পুরুষ ভোটার ১৪৭৪৯ এবং মহিলা ভোটার ১৩৮৭৫ জন।

\*\*\*\*\*

**Election Commission :**

মুখ্য নির্বাচন কমিশনারের নেতৃত্বে নির্বাচন কমিশনের অন্য দুই সদস্য আজ রাষ্ট্রপতি দ্রৌপদী মুর্মুর সঙ্গে সাক্ষাত করে ২০২৪ এর সাধারণ নির্বাচনের সামগ্রিক ফলাফল সহ প্রদত্ত ভোটের হারের সামগ্রিক তথ্য সংকলন রাষ্ট্রপতির হাতে তুলে দেন। নির্বাচন কমিশন আজ জানিয়েছে, ২০২৪ এর সাধারণ নির্বাচনে ৬৫.৭৯ শতাংশ ভোট পড়েছে। লাক্ষাদ্বীপে সবচেয়ে বেশি ৮৪ দশমিক ১৬ শতাংশ ভোট পড়েছে। তারপর আসামে ৮১ দশমিক ৫৬ শতাংশ এবং ত্রিপুরায় ৮০ দশমিক ৯৩ শতাংশ ভোট পড়েছে। বিহারে সবচেয়ে কম ৫৬.১৯ শতাংশ ভোট পড়েছে। এরপর উত্তরপ্রদেশে ৫৬. ৯২শতাংশ ভোট পড়েছে। সাধারণ নির্বাচনে সপ্তম এবং চূড়ান্ত পর্যায়ে সবচেয়ে বেশি ৬৩ দশমিক ৮৮ শতাংশ ভোট পড়েছে।

\*\*\*\*\*

**BJP-Khowai :**

লোকসভা নির্বাচনে পূর্ব ত্রিপুরা আসনে বিজেপি প্রার্থী কৃতি দেবী দেববর্মণ জয়ী হওয়ায় আজ খোয়াই শহরে বিজেপি'র উদ্যোগে এক বিজয় মিছিলের আয়োজন করা হয়। উপস্থিত ছিলেন পুর চেয়ারপার্সন দেবশীষ নাথ শর্মা, বিজেপি খোয়াই মন্ডল সভাপতি সুব্রত মজুমদার প্রমুখ।

\*\*\*\*\*

**Dipak majumder felicitation :**

টাউন বড়দোয়ালী বিজেপি মন্ডলের উদ্যোগে আজ আগরতলায় রামনগর বিধানসভা কেন্দ্রের উপনির্বাচনে বিজেপি'র জয়ী প্রার্থী দীপক মজুমদারকে সংবর্ধনা প্রদান করা হয়। অনুষ্ঠানে শ্রী

মজুমদার বলেন, জনগণ তাঁর প্রতি যে আস্থা দেখিয়েছে তার জন্য তিনি কৃতজ্ঞ। তাছাড়া আগরতলা পুর নিগম অফিসেও আজ শ্রী মজুমদারকে সম্বর্ধনা জ্ঞাপন করা হয়।

\*\*\*\*\*

#### **Convergence Meeting :**

ম্যালেরিয়া, ডেঙ্গু, চিকনগুনিয়া, জাপানিস এনকফেলাইটিস রোগ প্রতিরোধের লক্ষ্যে আজ কৈলাশহরে এক বৈঠক হয়। পৌরহিত্য করেন, ঊনকোটি জেলার জেলা শাসক দিলীপ কুমার চাকমা। পতঙ্গবাহিত রোগের বিরুদ্ধে আগাম সতর্কতামূলক ব্যবস্থা নেবার বিষয়ে এখানে কর্মপন্থা স্থির করা হয়। পরে জেলা শাসক আকাশবাণীর জেলা সংবাদ প্রতিনিধি অনুপম ভট্টাচার্য'কে জানান, ব্লকস্তরেও এই ধরনের বৈঠক করা হবে। তাছাড়া নানাস্থানে স্বাস্থ্য শিবির করার পাশাপাশি সচেতনতামূলক কর্মসূচি নেওয়া হবে। রক্তের নমুনা সংগ্রহ ও রোগ সনাক্তকরণের কাজ আরো সুসংহত করার উদ্যোগ নেওয়া হচ্ছে বলে তিনি জানান। উপস্থিত ছিলেন, ঊনকোটি জেলার সি,এম,ও ডাঃ শীর্ষেন্দু চাকমা, জেলা ম্যালেরিয়া আধিকারিক ডাঃ শঙ্খশুভ্র দেবনাথ প্রমুখ।

\*\*\*\*\*

#### **NDA Meeting :**

আগামী রবিবার ৯ই জুন প্রধানমন্ত্রী নরেন্দ্র মোদির নেতৃত্বে নতুন কেন্দ্রীয় মন্ত্রিসভার শপথ গ্রহণের সম্ভাবনা রয়েছে। সরকার গঠনের লক্ষ্যে এনডিএ তাদের প্রস্তুতি চূড়ান্ত করছে। আজ নতুন দিল্লিতে বিজেপি সভাপতি জে পি নাড্ডার সভাপতিত্বে এক

বৈঠক অনুষ্ঠিত হয়। বৈঠকে কেন্দ্রীয় স্বরাষ্ট্রমন্ত্রী অমিত শাহ, প্রতিরক্ষামন্ত্রী রাজনাথ সিং, কেন্দ্রীয় মন্ত্রী পীযুষ গোয়েল, প্রহ্লাদ জোশী, মনসুখ মান্ডাভিয়া এবং অশ্বিনী বৈষ্ণব, বিজেপির জাতীয় সাধারণ সম্পাদক তরুণ চুগ, দলের নেতা বিনোদ তাওড়ে এবং অন্যান্য বরিষ্ঠ নেতারা উপস্থিত ছিলেন।

নতুন দিল্লিতে জেডিইউ সভাপতি এবং বিহারের মুখ্যমন্ত্রী নীতীশ কুমারের বাসভবনেও বেশ কয়েকজন দলীয় নেতা দেখা করেন।

আগামীকাল নতুন দিল্লিতে বিজেপি, টিডিপি, জেডিইউ, এল.যে. পি(আর), শিবসেনা(সিন্ধে ফ্লক্সান), জেডি(এস)-এর নবনির্বাচিত সদস্যদের নিয়ে এনডিএ-র সংসদীয় দলের এক বৈঠকের কথা রয়েছে। গতকাল এন.ডি.এ-এর বৈঠকে এই মর্মে একটি সিদ্ধান্ত নেওয়া হয় যে শ্রী নরেন্দ্র মদির নেতৃত্বে ভারতবর্ষ প্রত্যেকটি ক্ষেত্রে সার্বিক উন্নয়ন প্রত্যক্ষ করেছে। আরো বলা হয় যে, দেশের মানুষ ৬ দশক পরে পর পর তিন বারের জন্য নিরংকুশ সংখ্যা গরিষ্ঠতার মাধ্যমে একটি শক্তিশালী নেতৃত্বকে নির্বাচিত করেছে।

\*\*\*\*\*

#### **Meeting :**

ইন্ডিয়া ব্লক নেতৃবৃন্দ আজ নতুনদিল্লিতে বৈঠক করেন। তৃণমূল কংগ্রেসের জাতীয় সাধারণ সম্পাদক ও সাংসদ অভিষেক ব্যানার্জি এবং দলের নেতা ডেরেক ও'ব্রায়েন নতুনদিল্লিতে সমাজবাদী পার্টির প্রধান অখিলেশ যাদবের সঙ্গে তাঁর বাসভবনে দেখা করেছেন।

আম আদমি পাটির নেতা এবং রাজ্যসভার সাংসদ রাঘব চাড্ডা শিব শেনা (ইউবিটি) নেতা সঞ্জয় রাউতের সঙ্গে বৈঠক করেছেন।

\*\*\*\*\*

#### **New MP Registration :**

নবনির্বাচিত সাংসদরা দিল্লি যেতে শুরু করেছেন। লোকসভা সচিবালয় অষ্টাদশ লোকসভার সদস্যদের স্বাগত জানাতে প্রস্তুত। সচিবালয়ের এক বিজ্ঞপ্তিতে জানানো হয়েছে, সদস্যদের স্বাগত জানাতে ও তাদের নাম নথিভুক্ত করতে বেশ কিছু পদক্ষেপ গ্রহণ করা হয়েছে। সময় বাচাতে ও কাগজ বিহীন ডিজিট্যাল পদ্ধতিতে নবনির্বাচিত সদস্যদের নাম অনলাইনে একটি সুসংহত ব্যবস্থার মাধ্যমে করা হচ্ছে।

এদিকে, মুখ্যমন্ত্রী অধ্যাপক ডা: মানিক সাহা, সাংসদ বিপ্লব কুমার দেব, সাংসদ কৃতি দেবী দেববর্মন, প্রদেশ বিজেপি সভাপতি রাজীব ভট্টাচার্য, তিপ্রা মথা প্রধান প্রদ্যোৎ কিশোর দেববর্মা আজ নতুন দিল্লি গেছেন।

\*\*\*\*\*

#### **Prasarbharati, Swearing :**

তৃতীয়বারের জন্য ভারতের প্রধানমন্ত্রী হিসেবে নরেন্দ্র মোদির শপথগ্রহণ অনুষ্ঠানের আগে, তথ্য ও সম্প্রচার সচিব সঞ্জয় জাজু, প্রসার ভারতীর সিইও গৌরব দ্বিবেদী, আকাশবাণীর মহানির্দেশক মৌসুমী চক্রবর্তী এবং দূরদর্শনের মহানির্দেশক কাঞ্চন প্রসাদ সহ ঊর্ধ্বতন কর্মকর্তারা আজ নতুনদিল্লির রাষ্ট্রপতি

ভবনে শপথগ্রহণ অনুষ্ঠান পরিচালনা করার জন্য প্রস্তুতি পর্যালোচনা করেন। উল্লেখ্য, এনডিএ সদস্যরা গতকালই সর্বসম্মতিক্রমে প্রধানমন্ত্রী এবং জোটের নেতা হিসাবে নরেন্দ্র মোদির নাম সমর্থন করেছিলেন।

\*\*\*\*\*

**TRAI :**

দেশের দূরসঞ্চারণ নিয়ন্ত্রক সংস্থা 'টেলিকম রেগুলেটরি অথরিটি অফ ইন্ডিয়া' (ট্রাই) ভোক্তাদের সচেতন ও তথ্য-সমৃদ্ধ করে তুলতে দেশজুড়ে কর্মশালা, সেমিনার সহ বিভিন্ন কর্মসূচির আয়োজন করছে। সরাসরি ভোক্তাদের কাছে গিয়ে আলোচনা করার এইসব কর্মসূচি'র অঙ্গ হিসেবে ট্রাই-এর কলকাতা আঞ্চলিক অফিসের উদ্যোগে আজ ধর্মনগরে 'উত্তর ত্রিপুরা জেলা পলিটেকনিক' কলেজে এক কর্মশালা ও মত বিনিময় অনুষ্ঠান হয়।

আলোচনা চক্রের প্রধান অতিথি হিসেবে ছিলেন উত্তর ত্রিপুরা জেলার জেলাশাসক দেবপ্রিয় বর্ধন তাঁর আলোচনায় এই ধরনের অনুষ্ঠান আরও বেশি করে করার গুরুত্ব ও প্রয়োজনীয়তার উপর জোর দেন। সম্মানিত অতিথি জেলার পুলিশ সুপার ভানুপদ চক্রবর্তী এই ধরনের অনুষ্ঠানের জন্য ট্রাই-এর প্রশংসা করেন। পলিটেকনিক কলেজের অধ্যক্ষ প্রণব দত্ত শিক্ষা প্রতিষ্ঠানগুলিতে ভালো মানের টেলিকম নেটওয়ার্কের গুরুত্বের কথা উল্লেখ করেন। আলোচনা চক্রে ট্রাই-এর এসআরও নিলয় দত্ত গ্রাহক-কেন্দ্রিক বিভিন্ন বিধি, নির্দেশিকা নিয়ে আলোচনা করেন। বিশেষ করে মূল্যযুক্ত পরিষেবা অর্থাৎ ভ্যালু এডেড সার্ভিস, অযাচিত



বাণিজ্যিক যোগাযোগ (ইউসিসি), মোবাইল নম্বর পোর্টাবিলিটি, বিভিন্ন অভিযোগের নিষ্পত্তির পদ্ধতি, ডেটা পরিষেবা ও এর বিভিন্ন মূল্য ইত্যাদি নিয়ে বিস্তারিত আলোচনা করেন।

অংশগ্রহণকারীদের বিভিন্ন মোবাইল অ্যাপের সুবিধা নিয়ে জানানো হয়। এর মধ্যে আছে 'TRAIMyspeed, TRAI DND 3.0, TRAI Mycall' ইত্যাদি অ্যাপ।

গ্রাহক বা ভোক্তারা কীভাবে সচেতন হবেন, সেইসব পদ্ধতিও হাতে কলমে দেখানো হয়। সাইবার অপরাধ ও সাইবার নিরাপত্তা নিয়ে আলোচনা করেন উত্তর ত্রিপুরা জেলার অতিরিক্ত পুলিশ সুপার জেরেমিয়া ডারলং। ট্রাই-এর যুগ্ম পরামর্শদাতা অসীম দত্ত 'সঞ্চার সাথী পোর্টাল' সহ বিভিন্ন নাগরিক-কেন্দ্রিক উদ্যোগ নিয়ে আলোচনা করেন।

\*\*\*\*\*

#### **Tipra women federation :**

তিপ্রা ওমেন ফেডারেশনের তৃতীয় প্রতিষ্ঠা দিবস আজ আগরতলায় টাউন হলে আলোচনা সভার মাধ্যমে উদযাপন করা হয়। অনুষ্ঠানে উপস্থিত ছিলেন তিপ্রা মথার সুপ্রিমো প্রদ্যোৎ কিশোর দেববর্মা, ও দলের সভাপতি বিজয় কুমার রাংখল সহ অন্যান্য নেতৃবৃন্দ।

\*\*\*\*\*

#### **Music college-Admission :**

শচীন দেববর্মন স্মৃতি সরকারি সঙ্গীত মহাবিদ্যালয়ে বি মিউজ অনার্স ও ডি মিউজে ভর্তির জন্য আবেদনপত্র গ্রহণ করা হবে

আগামী ১০ই জুন থেকে ১৮ই জুন পর্যন্ত। যোগ্যতা নির্ণায়ক পরীক্ষা হবে ২১শে জুন। নির্বাচিত ছাত্রছাত্রীদের তালিকা প্রকাশ করা হবে ২৫শে জুন। ভর্তি প্রক্রিয়া চলবে পয়লা জুলাই থেকে তেসরা জুলাই পর্যন্ত। ভর্তির আবেদনপত্র কলেজের ওয়েবসাইট [www.sdmgovtmusiccollege.in](http://www.sdmgovtmusiccollege.in) থেকেও ডাউনলোড করা যাবে। কলেজের অধ্যক্ষা এ খবর জানিয়েছেন।

\*\*\*\*\*

#### **Environment-Seminer :**

বিশ্ব পরিবেশ দিবস উপলক্ষে আজ খোয়াই দশরথ দেব মেমোরিয়াল কলেজে পরিবেশ রক্ষার উপর একটি সেমিনার ও বৃক্ষরোপণ কর্মসূচি অনুষ্ঠিত হয়। সেমিনারে উপস্থিত ছিলেন খোয়াই পুর পরিষদের চেয়ারপার্সন দেবশীষ নাথ শর্মা, কলেজের অধ্যক্ষ খোকন মজুমদার, কলেজের টিচার্স কাউন্সিল সচিব ডঃ বাবুরাম স্বামী প্রমুখ। কলেজ চত্বরে বৃক্ষরোপণ কর্মসূচিতে অংশগ্রহণ করেন ছাত্রছাত্রী, অধ্যাপক ও অধ্যাপিকাগণ।

\*\*\*\*\*

#### **Girls' T-20 Cricket :**

রাজ্য ক্রিকেট সংস্থা আয়োজিত সদরের আন্তঃ স্কুল মেয়েদের টি-২০ ক্রিকেট প্রতিযোগিতায় আজ একটি খেলা হয়। পুলিশ ট্রেনিং একাডেমি মাঠে দুপুরের খেলায় আসাম রাইফেলস পাব্লিক স্কুল ২৬ রানে নন্দননগর স্কুলকে পরাজিত করে। একই মাঠে সকালে প্রণবানন্দ বিদ্যাভবন বনাম ভবনস ত্রিপুরা বিদ্যামন্দির এবং নরসিংগড়ের পঞ্চায়েত মাঠে বিদ্যাসাগর স্কুল বনাম বড়দোয়ালী স্কুলের দুটি খেলা বৃষ্টিতে বাতিল হয়।

\*\*\*\*\*

**Weather :**

আগামীকাল আকাশ সাধারণত মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। তাপমাত্রা সর্বোচ্চ চৌত্রিশ ডিগ্রী এবং সর্বনিম্ন সাতাশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল বত্রিশ ডিগ্রী এবং সর্বনিম্ন তেইশ দশমিক এক ডিগ্রী সেলসিয়াস। গত চব্বিশ ঘণ্টায় বৃষ্টি হয়েছে ৪১ মিলিমিটার। আগামী চব্বিশ ঘণ্টায় রাজ্যের সব জেলায় বজ্র বিদ্যুৎ সহ ঘণ্টায় ত্রিশ থেকে চল্লিশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর।

\*\*\*\*\*